

Fundargerð. *Stjórnarfundar nr. 37.*

Stjórnarfundur Norðurár bs., haldinn í Stekkjarvík og á skrifstofu Sveitarfélagsins Skagastrandar þriðjudaginn 19. október 2010 kl:15:00.

Á fundinum voru stjórnarmennirnir Magnús B. Jónsson, Einar E. Einarsson, Vignir Kjartansson og Eiður Guðmundsson. Einnig var á fundinum Gunnar Svavarsson frá Eflu Verkfræðistofu.

Dagskrá

1. Staða framkvæmda – skoðunarferð í Stekkjarvík.
2. Fundargerðir síðustu funda.
3. Kostnaðarmat - gjaldskrá.
4. Kaup á tækjum og búnaði.
5. Samningur við Gámaþjónustuna.
6. Starfsmannahald.
7. Starfsleyfi.
8. Önnur mál.

Magnús Jónsson setti fund og bauð fundarmenn velkomna.

1. Staða framkvæmda.

Byrjað var með skoðunarferð um fyrirhugaðan urðunarstað í Stekkjarvík. Staða framkvæmda er þannig að útgreftri og mótun á sjálfu urðunarhólfinu er að ljúka. Einnig er búið að setja niður tanka vegna sigvatnskerfis frá urðunarhólfinu og verið er að leggja sigvatnslagnir og lagnir í síubeð. Byrjað verður að dúkleggja vegg hólfsins á næstu dögum en dúkurinn er að koma til landsins í þessari viku. Einnig er verið að gera veg frá urðunarhólfi að þjónustuhúsi og girða svæðið í heild sinni af. Gert er ráð fyrir að Héraðsverk ehf., klári alla sína verkþætti gagnvart Norðurá 15. nóvember, en Vegagerðin er einnig búinn að semja við þá um endurbætur og uppbyggingu á Neðribyggðarvegi sem verður gert samhliða.

Bygging þjónustuhúss gengur vel og er húsið að verða fokhelt. Búið er að steypa frárennslis flór vegna þvottaplans og undirstöður fyrir vigtina en hún er kominn til landsins. Í næstu viku verður planið malbikað og eftir það er hægt að ganga endanlega frá uppsetningu vigtar.

Búið er að ganga frá lagningu kaldvatns að þjónustuhúsi en eftir er að setja dælu í brunninn og tengja en þessar framkvæmdir voru gerðar í samráði við landeigendur á Sölvabakka sem einnig munu tengjast sömu vatnslögn. Vatnsnotkunin er endurgjaldslaus en Norðurá bs. rekur umrædda lögn.

Eftir er að leggja þriggja fasa rafstreng að þjónustuhúsi en Rarik hefur boðið verkið út en beðið er eftir efninu og verður þá strengurinn plægður niður.

Verkstaðan í heild er því góð og allt sem bendir til að hægt verði að opna urðunarstaðinn um leið og endanlegt starfsleyfi liggur fyrir.

2. Fundargerðir síðustu funda

Fundargerðir funda nr. 33, 34, 35 og 36 undirritaðar formlega en þær höfðu áður verið samþykktar á tölvupósti.

3. Kostnaðarmat - gjaldskrá

Gunnar Svavarsson lagði fram uppfært rekstarmódel fyrir urðunarstaðinn og samantekt á þeim kostnaði sem kominn er miðað við áður áætlaðan kostnað við framkvæmdina. Búið er að setja inn í kostnaðaráætlunina þau viðbótar- og aukaverk sem samið hefur verið um við Héraðsverk á verk tímanum.

Í heild er gert ráð fyrir að verkið verði um 80 milljónum ódýrara en ráð var fyrir gert í upphafi en þar vegur þyngst gott verð sem fékkst í gerð urðunarhólfins og að Vegagerðin mun sjá um endurbyggingu Neðribyggðarvegar. Aðrir kostnaðarliðir eru flestir samkvæmt áætlun og/eða í samræmi við ákvörðun stjórnar um breytingar frá fyrstu áætlun.

Rekstarmódel fyrir urðunarstaðinn frá árinu 2011 til 2038 sýnir að kostnaður við urðun muni eins og áður hefur komið fram mest sveiflast eftir sorpmagni og þeim framkvæmdum sem ráðast þarf í hverju sinni eins og gerð næstu áfanga urðunarhólfins, en gangi áætlanir eftir þarf að grafa áfanga II árið 2015. Meðaltals urðunarkostnaður á umræddu árabili er áætlaður 7,7 krónur á kíló. Samþykkti stjórnin samhljóða að 7,70 kr./kg yrði gjald fyrir urðun sorps árið 2011 fyrir eigendur og þá sem eru með bindandi samning um magn til ákveðins tíma. Urðunargjald var ákveðið 8,50 kr./kg fyrir aðra sem semja um óskilgreint magn og hafa ekki bindingu til viðskipta í ákveðin tíma. Ákveðið að endurskoða á gjaldið fyrir 31. október 2011. Þá mun einnig liggja fyrir skráning um flokkun á þeim úrgangi sem er að berast og í framhaldinu verður tekin ákvörðun um hvort vera eigi með mismunandi urðunargjöld eftir efnisflokkun á sorpi.

4. Kaup á tækjum og búnaði.

Gunnar lagði fram lista um þá aðila sem boðið hafa sorptroðara til sölu og sundurliðun á gerð þeirra, aldri og verði. Stjórnin var sammála um að reyna fyrst kaup á einhverjum af þeim troðurum sem til eru í landinu en um leið má hann ekki vera of gamall eða allt of mikið notaður en hætta er á að þeim fylgi meiri viðhaldskostnaður. Farið var yfir listann og Gunnari falið að vinna áfram að málinu og gera gagntilboð með sjónarmið stjórnar í huga.



5. Samningur við Gámaþjónustuna.

Magnús lagði fram endurbætta útgáfu af samningi við Gámaþjónustuna hf. um móttöku og förgun úrgangs frá landssvæðum sem ekki tilheyra áður gerðum samningi við Flokkun Eyjafjörður ehf.

Stjórnarmenn sammála um að það sé hagstæðast fyrir alla aðila að Norðurá bs. berist sem mest magn til urðunar en margt bendir til að magnið af núverandi starfssvæði Norðurá bs. verði minna en áætlað hefur verið. Helsta ástæða þess er aukin flokkun fyrirtækja á svæðinu og minni umsvif í þjóðfélaginu. Magnúsi falið að kynna forsvarsmönnum Gámaþjónustunnar þær breytingar sem gerðar voru á samningnum og verði ekki gerðar athugasemdir við það að hálfu Gámaþjónustunnar mun stjórnin samþykkja samninginn.

6. Starfsmannahald

Samþykkt að ráða til að byrja með einn starfsmann til Norðurá bs., og að hann sjái um alla daglega stjórnun og framkvæmd á urðunarstaðnum. Viðkomandi aðili þarf meðal annars að hafa vinnuvélaréttindi, kunna á tölvu og geta starfað sjálfstætt. Ákveðið að auglýsingin verði birt í blöðum í Skagafirði og Húnavatnssýslum í næstu viku.

7. Starfsleyfi

Gunnar gerði grein fyrir stöðunni á umsókn um starfsleyfi til Umhverfisstofnunnar. Athugasemdafrestur er til 29. október og eftir það hefur stofnunin 4 vikur til að afgreiða leyfið. Berist engar athugasemdir gæti leyfið verið gefið fyrr út, en enn sem komið er hafa engar athugasemdir borist.

Með hliðsjón af stöðu verkþátta og starfsleyfis bendir því allt til að hægt verði að opna urðunarstaðinn formlega 1. desember 2010

8. Önnur mál

Enginn.

Fundi slitið kl. 19:30

Magnús B. Jónsson

Einar E Einarsson

Eiður Guðmundsson